

奉天通志 卷一百五十九
鳩工俾爾堅固豎立石碑永永不磨庶昭朕仰體先皇篤厚遠人至意云爾

順治十五年七月十七日立

按碑在遼陽城南喇嘛園

索尼誥封碑

順治十六年

誥命

奉 天承運 皇帝制曰父有令德子職務在顯揚臣著賢勞國典必先推錫用申新命以表前休爾邵斯榜式乃一等伯總理朝內事務內大臣兼掌牛彖加議政大臣索尼之父識天之命盡臣之誼志切來歸忠誠已著迨爾子功懋旂常益見傳來之訓茲以覃恩贈爾爲光祿大夫牛彖章京一等伯總理內朝事務內大臣

加議政大臣錫之誥命於戲率行式穀澤流青史之光教孝作忠榮耀紫綸之色永培祀胤益庇昌隆 制曰國之最重者惟是忠蓋之臣家所由興者以有劬勞之母特頒恩命用慰子情爾一等伯總理朝內事務內大臣兼掌牛彖加議政大臣索尼之母黑攝里氏慈能育子教可傳家念茲靖共之猷實本恩勤之訓母德旣著渥典宜加茲以覃恩贈爾爲一品夫人於戲頒爵用以榮親褒忠因之教孝錫隆恩於不匱表嘉譽於來茲欽服寵綸用光泉壤與五臣同固山額真邵科羅把圖魯謐敏壯安邊我碑文

順治十六年

朕惟國家開創大業必有英賢佐命建立鴻勳生固顯秩崇階振德望於天下歿亦榮名美謚傳盛烈於後昆此錄故舊之深恩勸

人臣之巨典也爾安邊我英姿亮節出應昌期當太祖武皇帝開創之時攻城殺敵著有殊功蒙恩優賜邵科羅把圖魯名色與五大臣同又賜一牛彖并半牛彖補授固山額真克盡厥職勞績難泯及朕登極追念舊勳以爾子達爾代西爾代等優陞官秩今特重加卹典循古□名之義諡曰敏莊并勅部造立墳塋樹之豐碑垂諸不朽用酬元臣盡瘁之義昭朕不忘故舊之至意云爾

順治十六年十二月初四日立

景祖翼皇帝碑文

順治十八年

大清

粵稽祖德攸崇爰啓承家之緒宗功有永益隆篤祐之思葢追盛業以遡開天宜紀鴻勳以昭受命既彰發祥之有自更申錫福之

無疆洪惟我 景祖翼皇帝暨 翼皇后弘謨大烈厚澤深仁雖

未集耆定之勳而不宣有象實始建經綸之業而式廓用光令緒不昭已見六州歸命皇圖肇造先占率土傾心原廟重新弓劔衣冠皆起羹牆之慕山陵永奠子孫臣庶咸蒙佑啓之仁爰勒豐功作本支之百世載揚休烈錫嘉祉於千秋繼述遐昌昭垂不替

順治十八年九月初八日立

顯祖宣皇帝碑文

順治十八年

大清

蓋惟天肇一代之運必著開先啓後之勳聖垂百世之謨必有積德累仁之實不基方建締造惟勤大業式弘駿鴻宜勒用申報本之典益章受命之符洪惟我 顯祖宣皇帝暨 宣皇后文謨不

顯武烈載揚星流華渚已乘赤日之祥電繞辰樞更兆神龍之瑞
雖皇猷肇啓大勳未遍於寰區而帝緒昭垂聖德實留乎奕禩橋
山載闢百千載無斃明禋原廟重新億萬年用鑄令烈承庥有永
佑祚無疆

順治十八年九月初八日立

關王廟額

康熙年

康熙歲次己丑秋九月穀旦

至

大

至

剛

山西商人等薰沐謹

仁和戴梓書

印印

按撰文者為劉九容據榆林府志選舉志劉九容嘉靖十一年
壬辰進士官山東按察司副使又人物志劉九容榆林人歷官
山東僉憲風采巖峻庶僚畏服又按明實錄嘉靖十九年三月
始添設整飭遼東金復海蓋兵備山東按察司僉事一員九容
卽始授此官者當時駐劄金州故碑文有備邊金州之語至所
稱以攝分守道事入遼而全遼志分守道下並無九容之名想
係暫攝而已又碑文代巡胡公文舉字道鄉乙酉鄉進士全遼
志作福建閩縣人舉人中丞劉公卽劉儲秀以嘉靖十八年九
月巡撫遼東全遼志作陝西咸寧人副都御史是時胡文舉正

勘上遼東開原義州等處功罪見嘉靖二十三年實錄與重修此廟同時故碑文中對於胡公推崇備至瓢守清定遼前衛人後陞撫順備禦有傳見全遼志職官志

按此明嘉靖二十年遼陽重修關王廟記語

也誤置於此碑文見二百五十七卷

重修地藏禪院記

康熙三年

吳僧超見撰

稽自秦漢以來三教鼎立各顯其道於天下無不共濟而偕臧焉至若闡揚心性表彰因果罔不曲盡其旨趣者釋氏之教其庶幾乎夫釋教所載聖賢應化之事誠難思議而地藏大士尤非尋常所易測識經不云乎衆生度盡方證菩提地獄未空誓不成佛由是而觀則大士愍念於羣生者甚切故羣生感仰於大士者亦甚

篤天下城邑咸爲建刹立像崇祀不懈者豈徒然哉錦城東北郭門外舊有地藏寺未知創自何代屢經兵革香火蕭條維世祖定鼎十有三載禪僧妙覺自江南飛錫而至本城大檀越穆公景賢爲之捐俸資購田園接待雲水已歷有年第殿宇傾頽覺公毅然有鼎新之意力猶不足賴今穆公維熙善繼父志仍復捐資倡修十方緇素共相玉成凡所謂故者新之傾者建之自正殿禪堂山門廊廡與夫廚庫之室器用之需無弗經營就緒煥然可觀肇工於康熙癸卯之季春竣工於次歲甲辰之仲秋誠速矣哉夫通都大邑之寺有殘毀數十年而不克修者有議修數十年而不克成者況遼左被兵最久民不聊生之地乃收鴻功於指日成梵宇於期年是非穆公之大力衆善之同心覺公之弘願奚克奏功如是

之敏也嗚呼予恐後之主斯寺者未獲深體前人心不惟負穆公亦負衆善不惟負衆善亦負覺公不惟負覺公亦負大士矣雖然穆公可負也衆善可負也卽覺公亦可負也惟大士可負乎不可負乎不禁悚然而爲之記

按錦縣志略地藏寺在城東門外每歲有司致祭厲壇於此寺爲古刹清初爲十方常住叢林康熙三年重修東吳廳月主人超見撰文勒碑紀其事碑右題名者有太保吳應熊漕督蔡士英欽差管理寧錦佐領劉文亮朝鮮賫咨官全天杓諸人按卽此碑而無吳應熊等名應檢原碑補之

清內閣大學士諡文成達海之碑

康熙四年

清光祿大夫內閣大學士諡文成諱達海之碑

康熙四年歲次□巳孟夏丁卯穀旦內□□院學士加一級孝男
常格參領刑部郎中加一級孝孫禪布□領加一級孝孫□□□

按此碑有日無文清國史列傳達海傳世居覺爾察以地爲氏達海九歲讀書能通滿漢文義太祖召直文館奉命譯明會典天聰三年太宗征明遣達海齎書與明議和明人閉關不啟又曰詳定國書字體初太祖指授文臣額爾德尼及噶蓋創立國書形聲規模本體略具達海繼之增爲十二字頭至是上諭達海曰國書十二字頭向無圈點上下字雷同無別幼學習遇書中尋常語言視其文義猶易通曉若人名地名必致錯誤爾可酌加圈點以分析之則音義明曉於字學更有裨益達海遵旨

尋譯酌加圈點是年六月卒十年二月賜達海諡曰文成第四子常額特授學士長子雅秦子禪布康熙八年任祕書院學士為達海請立碑得旨達海巴克什通滿漢文字於滿書加圈點令其字畫分明又照漢字增造字樣於今賴之念其效力年久著有勤勞仍追立碑云云禪布為達海之孫故曰孝孫又禪布為達海請立碑事亦見東華錄康熙八年五月己未文與傳同此碑立於康熙四年故禪布書銜為參領郎中不稱學士以在八年以前

大士菴莊嚴法像記 康熙五年

丙午之春余得請假出關省視塋墓因過寧遠城西北陬上帝廟廟之旁有大士菴殿宇傾頽金身暴露儼然一瓦礫之場也僧圓

福者苦行力耕因而鼎新其棟宇權輿其法像而蒲月之 湖開始

鳩工庀材迄荷月哉生明之日未遂莊嚴余捐貲五十金用襄勝

果三伏之辰僧以竣事來告且礮石請為之記 余曰余之因省塋

墓而過大士菴 偶也其見像之未成而遂成之亦偶也僧不言余

且忘之矣夫何記哉且夫 細人有一善行斤斤然日以獲報 為期

君子弗道也又何事記之以傳後乃謂之曰是舉也余非以邀福

也顧念頻年戎馬倥傯余之去故鄉也久而身親兵革荒涼蕭瑟

之狀輒有感於余心故凡在故鄉之左右 關邑城堡莫不經營策

畫鞏固 而滋培之一瓦一石皆願得而修治之況其為象教之所

憑瞻仰之所寄者 乎則更宜莊嚴無缺是助贊之念所由起並不

從佛生也爾何記焉客有聞是語者曰是可以告故鄉諸君子矣

乃爲之

記云

按大士菴在今興城縣蔡士英撰記康熙五年立見興城縣志
清誥封資政大夫總督江南江西等處地方軍務兼理糧餉兵部
尙書兼都察院右副都御史三等阿達哈哈番潤甫馬公墓誌銘
光祿大夫少師兼太子太師刑部尙書文淵閣內國史院大學
士通家舊治生曲沃衛周祚頓首拜撰文
光祿大夫太子太保戶刑二部尙書前太子少保戶部左右侍
郎奉勅酌修直省賦役全書兩侍經筵三充讀卷官池陽王
弘祚頓首拜書丹
賜進士第資政大夫禮部尙書管左郎事前禮部右侍郎兼內
弘文院學士翰林院掌院學士內祕書院侍讀學士右春坊

右庶子左春坊左諭德司經局洗馬左春坊左中允國子監
司業內國史院檢討庶吉士充順治大訓孝經衍義纂修官
壬辰科會試同考戊戌科武會試主考五充文武殿試讀卷
官教習庶吉士甲辰科知貢舉經筵日講官都門王熙頓首
拜篆額

嘗讀詩至思皇多士生此王國又曰濟濟多士文王以寧未嘗不
嘆其盛也竊見世祖章皇帝時一時從龍之彥郁郁紛紛皆舟楫
霖雨才也如潤甫馬公爲遼之名士受世祖皇帝特達之知敷歷
中外績高南北無何退居綠野竟賦玉京震器坦公請銘於予予
雖素昧平生曾在子民之誼敢不誌諸按狀公諱鳴佩字潤甫派
出扶風先世爲山東登州府之蓬萊縣人始祖諱英爲遼東保義

副尉遂占籍遼陽左衛至四世祖保義副尉諱越公配丁氏生宣義郎文學始爲關東望族配岳氏陳氏岳氏生重德公以文學著授江南太平府別駕廉恕明斷有政聲以覃恩誥贈資政大夫阿達哈哈番配楊氏誥贈夫人生三子長與進次與遴次與選與遴公克承先業尤邃於理學贈資政大夫阿達哈哈番配趙氏贈夫人生二子長卽潤甫公次鳴玳中副榜早卒潤甫公生而剛毅敏達從父受戴記蚤夜力學博通子史尤工於書父恆撫之曰振吾家聲者其此乎年十七爲諸生卽有文名會父母喪哀毀骨立鄉黨以孝稱我清應運龍興公以文學受知於太宗文皇帝授工部啓心郎公負經濟才知無不言上甚稱之世祖章皇帝定鼎燕京公從入都授山西潞汾道左參政值地方初定公威惠兼施郡邑

攸賴未幾轉分巡下湖南道靖盜安民政聲赫然特簡戶部右侍郎總督江南各省糧儲兼理錢法公受事七載綜覈有聲會裁缺回部補戶部侍郎俄而命總督倉場轉戶部左侍郎國計軍糈督催罔詘順治十一年特命總督宣大軍務時晉寧營伍廢弛民生凋敝公受事修繕城堡密布方略外殲賊而內撫衆境內晏然先是總督江南江西責重政劇擇堪任之人世祖章皇帝特命公往適海氛窺逞崇明失守公苦心運籌出奇制勝崇明旋復東南半壁卒保無虞公嘗在制府早起晏臥裁決政務心力勞瘁以致目眚因而具疏懇辭奉有馬鳴佩謹慎老成効力已久今引年稱目病不能辦事情詞懇切著吏部議奏之旨後議上奉旨是馬鳴佩著回京調理病痊起用公回京日杜門靜養惟教子課孫間延鄉

里耆舊談讌賦詩而已其他一無所涉自孟夫人仙遊後不蓄媵妾林下十載不改其常嘗購貸千金贖族叔昆弟俾完聚復業雖尊父之遺命人皆賢之公在任時屢有血疾宿患未除乙巳夏偶舉發浸淫漸不能起至丙午正月遂卒卒之日惟以竭力報國勉承先業囑其子其他不及一語嗚呼真丈夫哉公累授資政大夫總督江南江西等處地方軍務兼理糧餉兵部尙書兼都察院右副都御史三等阿達哈哈番生於庚子年二月初十日亥時卒於康熙五年正月二十日酉時享壽六十有七元配王氏繼祝氏贈夫人俱先卒繼孟氏庠生孟養恬長女封夫人子一雄鎮宗人府啓心郎加一級孟夫人出娶張氏原任巡撫山東都察院右副都御史張儒秀次女贈淑人繼娶李氏佐領加一級李登龍次女封

淑人女四長適關處士子關鍵次未字俱早卒次適原任巡按江西監察御史王誌佐六男學聖次適原任巡按江南監察御史鍾有鳴次男韻亮長孫男世濟官監生娶董氏原任巡撫直隸都察院右副都御史加三級董天機姪舉人董子華長女張淑人出孫女五長未字張淑人出餘俱幼未字李淑人出茲於康熙 年

月日葬於

之新阡是宜銘銘曰

眞主龍興攀龍附鳳翊贊文英協於帝衷運餉江南鄧侯伯仲統帥文武機宜淵洞綠野歸歟棲遲梁棟白玉樓成歛然如夢倦念哲人物情悲慟松柏億年兆祥厥中

按潤甫馬公卽馬鳴佩爲馬雄鎮之父耆獻類徵見疆臣有國史本傳及邵長蘅所撰家傳此誌爲內國史院大學士衛周祚

撰周祚見貳臣傳誌言始祖英爲遼東保義副尉占籍遼陽左
衛按保義副尉見元史百官志武散官從八品明會典同副將
卽明副總兵多以都指揮使等官充階在二三品去保義副尉
懸絕傳作保義副將將字係誤文又言四世祖保義副尉越生
宣義郎文學始爲關東望族明史職官志正七品吏材幹授宣
義郎文學至文七品始爲望族則知英爲保義副尉非副將傳
言崇德元年甄別內三院官鳴佩列二等誌無之誌言授山西
潞汾道左參政傳但言擢山西冀南道按清初沿明制各有道
員皆以布政司參政參議按察司副使僉事至乾隆 年始
專稱守道兵備道等去布按兩司參副等銜傳不稱左參政是
去鳴佩本官蓋以乾隆後之制改順治初之制不合

東華錄順治十一年二月壬午馬鳴佩由倉場侍郎爲兵部右
侍郎兼右副都御史總督宣大山西誌傳載鳴佩督兩江有平
僞伯陳其綸據瑞金及明張名振入崇明事誌不如傳之詳家
傳有薦梁化鳳事而誌與傳皆不及子雄鎮後以廣西巡撫死
事最烈見忠義傳此誌但言爲宗人府啟心郎康熙八年雄鎮
始任廣西巡撫誌撰於康熙五年在其前張儒秀爲山東巡撫
見東華錄順治四年二月癸酉董天機爲直隸巡撫見順治十
一年九月丙申皆遼東人八旗通志皆列入漢軍王誌佐見國
朝御史題名順治三年由奉天貢士高陽縣知縣行取浙江道
御史巡按江西與誌合

又按誌題光祿大夫少師兼太子太師刑部尙書文淵閣內國

史院大學士通家舊治生曲沃衛周祚拜撰文光祿大夫太子太保戶刑二部尚書戶部左右侍郎奉敕酌修直省賦役全書兩侍經筵三充讀卷官池陽王弘祚拜書丹賜進士及第資政大夫禮部尚書管左侍郎事都門王熙拜篆衛周祚王弘祚均見貳臣傳周祚以順治十二年五月擢工部尚書乾清宮成加太子太保奉先殿成加少保十五年調吏部尚書旋授文淵閣大學士兼管刑部尚書清初沿明制大學士初沿明制十六年晉少傅兼太子少傅十七年十一月考滿晉少師兼太子太師十八年復內三院改國史院大學士康熙八年四月以病引退命馳驛歸皆與誌題銜合馬鳴佩曾任宣大山西總督周祚曲沃人故曰舊治生弘祚以順治二年改授戶部郎中部臣以弘祚諳習掌故奏

令編訂賦役全書六年遷太僕寺卿仍兼戶部郎中十年擢戶部右侍郎十一年轉左侍郎十五年賦役全書成尋擢戶部尚書加太子少保東華錄順治十五年七月十六年晉太子太保

十八年乞假歸葬允所請康熙三年六月補刑部尚書十一月復任戶部尚書七年罷任誌在五年正弘祚任戶部尚書時弘祚永昌人而題池陽以原籍陝西王熙見滿漢名臣傳東華錄順治十八年十二月丁巳命內弘文院學士王熙以禮部尚書管左侍郎事康熙五年十一月丁丑朔遷左都御史此誌在十一月前故不書左都御史王熙爲清初名輔凡耆獻類徵名臣事略滿漢名臣傳清國史館列傳皆有專傳而此誌題銜則自選庶吉士後所列之職及差幾於備載爲歷來題誌所鮮見亦

可異也

清重建錦州府儒學碑記

康熙九年

知府宋之鉉撰

本朝龍飛瀋甸河西厥維右輔康熙甲辰歲登錦州爲府錦寧廣三州縣隸焉考故明初設廣寧左屯中屯衛中年建廟學於衛治之西北則揆文奮武其爲綏弼雄服也久矣予以乙巳秋蒞任至次年闢府治於錦城緣兵燹之餘城郭邱墟人民寥落曩之學宮僅存櫺星一門牌坊二座予心愴然時方圖輯哀鴻未遑學校之事迨學政堂白公肇舉科試文武英才聚於斯將祭菜者無地鼓篋者無所予遂有修舉意乃身任其責而廣文張君又贊成之集資鳩工有位者捐俸家殷者樂輸復減祀典之經費以佐用令經

歷陶君董是役卽其地建正殿三楹明倫堂五楹啓聖祠三楹自此春秋享祀庶嘉禮不委諸蓁莽而闕略孔多經營區畫間越六載庚戌錦尹蔡君偕廣文李君商之於予曰今天子崇奉先師臨雍釋奠萃滿漢秀民共陶淑於儒教而學宮之規制宜全於是仿前之所行仍提祀費之半續構兩廡各三楹而從祀之棟宇粗具矣嗣後上丁歲祀割牲者於堂瘞毛者於室俎豆馨香靡所不荐而駿奔而裸獻簫管迭奏燎於庭者煌煌懿哉爍乎間從課士之暇竚露臺而眺望效古景岡之相則見浮屠峙左方爲文筆峰呂洪山昂藏朱雀爲案瀚海遶於南涯爲外拱洵域樸之勝地故開科以來人才日盛膺鶚薦者數人宴鷹揚者數人詎止此哉山川之氣積之也深則發之也遠漸摩之久必有申伯樊侯者流應運

而興作邦家柱石於是學基始則締造成自今日式廓大於異時
際重熙累洽之隆按殘碑而拓故址改建增構如戟門如泮水如
園橋暨鄉賢名宦祠次第營立全俟後之君子踵事增華壯上庠
之觀庶貞珉藉以不朽云

按盛京通志錦州府儒學在府治西卽明中左屯衛學

全遼志
錦州城

廣寧中屯衛左屯衛治儒學正統元年都御史李潛創建成化

間於城隍廟得元加封先師碑知爲文廟舊址弘治間副使李

貢參將胡忠備

正統元年巡撫李公濬疏請創建成化己亥指

揮白欽增修嘉靖丙寅撫巡魏學曾鎮守王治道等重修江奎
有碑記其事本朝康熙五年知府宋之鉉因舊制重修聖殿三
間續修啓聖祠一所東西廡各三間明倫堂五間十七年知府
劉源溥重修戟門泮池等處二十三年知府孫成修東西木坊

四十年知府顧大位重修殿廡坊門等處五十年知府唐之夔
教授何來似同捐修戟門泮池五十八年大司成尹泰知府馬
鍾華知縣周廷槐教授閻九疇倡紳士等捐修聖廟生員劉俶
捐修照壁一坐云云按江奎碑已錄前此碑記卽宋之鉉重修
時立之鉉康熙四年任知府浙江奉化拔貢記云學政堂白公
見職官奉天府府丞白尙登遼東人貢士康熙三年任廣文張
君者張瑄薊州歲貢康熙四年任教授記又言庚戌錦尹蔡君
偕廣文李君商於予續構兩廡各三楹蔡君爲蔡啓新順天大
興人以康熙九年任錦縣知縣記未言開科以來膺薦者數
人康熙己酉科舉人爲錦縣楊毓先寧遠王士錚壬子科爲寧
遠沈一揆廣寧張澄殆卽碑所指者宋之鉉在任頗久康熙十

四年清苑劉源溥始代之己酉壬子皆之鉉任時通志於修兩
廡併書於康熙五年以此記證之則在康熙九年以後錦州明
季被兵苦守最久而櫺星門牌坊仍存亦幸矣

清索尼紀世德碑序

康熙六年

皇清輔政大臣一等公男索尼恭記 索尼仰承世德幸際昌期
恭蒙 太祖高皇帝 太宗文皇帝 世祖章皇帝三朝簡任歷
參機密 恩眷有加□進一等伯□□□□□□□寵贈三世
又以第五子心裕尙 公主遭遇之隆古今罕觀業勸貞珉傳諸
永世矣復蒙 世祖皇帝於彌留之日頒示 遺詔首命為輔臣
贊理政務尼欽承 顧命益矢公忠□□□□□ 聖躬下釐庶績
又蒙 太皇太后篤眷世勳擇尼長男噶布喇第二女册立為

皇后正位中宮六載以來□□□□□□□工□□我 皇上俯念成
勞特舉懋功之典復於所得一等伯外授為一等公世襲岡替伏
念尼歷事 四朝鞠躬盡瘁臣節應爾曷敢言功□□命再□□

□殊寵戚□勳門恩榮莫並撫躬□省何以克承此皆我

先妣
考妣

積德凝庥冥漠啓佑之所致也敢不敬銘碑版備頌 天恩慰幽
靈於九京賁榮光□□□□願我子若孫勉思□烈世為忠貞以
上報 皇仁永永無斃而已謹記 康熙六年六月吉日敬立

按八旗滿洲氏族通譜都英額地方赫舍里氏碩色克巴什子
索尼歷任內大臣兼內務府總管受顧命為輔政大臣特加恩
寵授一等公索尼卒諡文忠第五子心裕襲一等伯歷任領侍
衛內大臣又索尼之長子喀布喇初任領侍衛內大臣兼佐領

聖祖以喀布喇孝誠仁皇后之父特封一等公加太子少保卒
又王氏東華錄順治十八年正月丙辰召原任學士麻勒吉學
士王熙草遺詔諭以輔政大臣索尼蘇克薩哈處必隆鼐
拜姓名康熙四年七月辛卯聘皇后阿舍里氏內大臣噶布喇
之女九月辛卯册阿舍里氏爲皇后六年四月癸酉旨索尼歷
事累朝畢殫忠忱遵奉遺詔輔理政務懋著勞績深爲可嘉著
於所有一等伯外授爲一等公六月 酉子故輔政大臣一等
公索尼祭葬諡文忠七月乙巳先是三月內輔政公索尼等奏
請親政至是下旨曰朕年尙冲幼欲再俟數年輔政臣等奏云
世祖於十四歲親政今主上年德相符乃率輔臣往奏 太皇
太后諭以帝尙幼冲緩一二年更奏輔政臣等復奏主上躬親

萬幾臣等仍行佐理 太皇太后俞允擇吉親政丁巳蘇克薩
哈拏問己未康親王傑書等議應將蘇克薩哈官職革去凌遲
處死上知鼐拜等怨蘇克薩哈爭論積以成讐欲處之極刑堅
執不允鼐拜強奏數日竟坐蘇克薩哈處絞八年五月戊申命
議政王等拏問輔臣公鼐拜等庚申旨鼐拜效力年久朕不忍
加誅著革職籍沒拘禁遏必隆革太師及公爵云云按康熙四
輔臣蘇克薩哈處絞鼐拜拘囚遏必隆削革惟索尼善始善終
身名俱泰亦可云忠勤之報碑立於六月索尼卽以是月卒蓋
已老病

追封和碩穎親王諡毅薩哈廉碑文

康熙十一年
在本溪縣治太子河南王墳

自古帝王創業垂統必懋建本枝以作屏藩故生隆顯爵歿錫豐

碑典甚重也爾薩哈廉貝勒負姿忠亮中外所推膚功屢建甲冑躬環努力行間職司邦禮盡心典則益著寅清洵百代所當瞻仰者也擬封多羅郡王忽焉長逝 太宗文皇帝睠爾勲勞追封爲和碩穎親王以示隆眷於康熙二年特賜卹典勅建豐碑朕今追念前徽加諡曰毅重勒貞珉用傳不朽以示敦睦懿親之意云爾康熙十一年八月初一日立

按本溪縣志穎親王墓在太子河南距縣里許墓前神道碑巍然猶存係康熙十一年所立耆獻類徵薩哈麟傳王爲太祖孫禮烈親王代善第三子天命十一年征喀爾喀巴林部札魯特部俱有功封貝勒崇德元年五月薨年三十三追封和碩穎親王康熙十年六月追諡曰毅乾隆十九年九月入祀盛京賢王

祠

皇清誥贈光祿大夫佐領拜他喇布勒哈番工部尙書阿公碑

康

康熙十二年
徵訪

聞之大江之水源於濫觴泰山之雲起自膚寸物之有本也如是而況人才之生於王國者乎傳曰子之能仕父教之忠親之成其子也記曰士庶人有善本諸父母子之成其親也士庶人必推善於所生而卿大夫以上流愈遠而發愈長者益可知矣大司空吳公將樹石於贈光祿大夫阿公之墓而乞文於余余又何敢辭公諱阿諸祜世爲滿洲望族生而魁岸偉異旣長慷慨負氣有不可一世之概太宗文皇帝時命爲使往來於朝鮮蒙古諸國公不辱君命宣布德意著有勞績燕居每顧謂司空公受教惟善成吾志

者此子也司空公既貴卽以忠孝大義誦爲訓戒司空公受教唯謹歷官自翰林比部晉督捕侍郎復佐銓宰陟大司空上結主知下樹物望稱極榮矣而皆恪稟公之教有以致之公能慈故能教其子以不冤一獄公能平故能教其子以不隳一職公能廉故能教其子以不貪一錢詩云教誨爾子式穀似之凡公未竟之志司空悉贊而述之以伸其用於旃廈之上卽不啻公之自見於設施者甚矣濫觴之水足以導岷山之源膚寸之雲足以致崇朝之雨惟其所積者厚故其沛然而莫禦者有如此其盛也司空公惓惓先澤一飯不忘異日秉軸贊元將更光大公之舊德蓋榮懷在國家利濟在天下而不獨爲公九原之慰也

康熙十二年 月 日

賜進士出身光祿大夫太子太傅戶部尙書保和殿大學士加二級李蔚頓首拜撰

按碑首題贈光祿大夫佐領

闕他

闕布勒喀

闕

工部尙書阿公

碑以碑文大司空吳公考之吳公卽吳達禮阿公者吳達禮之父按王氏東華錄順治十六年十一月癸酉督捕左侍郎吳達禮罰俸一年十七年四月吳達禮降二級調用康熙五年四月吏部左侍郎吳達禮以病乞休允之康熙五年十月壬申自刑部左侍郎爲工部尙書十四年十月丁丑轉吳達禮爲刑部尙書碑末題康熙十二年正吳達禮任工部尙書時故曰大司空吳公碑官督捕侍郎佐銓宰陟大司空皆與東華錄合又碑末題賜進士出身光祿大夫太子太傅戶部尙書保和殿大學士

李霽撰按清國史列傳李霽傳順治三年進士十二年遷祕書院學士十五年五月授祕書院大學士九月改東閣大學士十六年三月加太子太保十八年復改弘文院大學士九年改保和殿大學士王保和殿大學士兼戶部尚書十一年世祖實錄告成加太子太傅霽所題官皆與傳及東華錄合時循明制大學士仍兼尚書至乾隆五十八年始停又吳達禮十五年三月癸卯自刑部尚書為禮部尚書十六年八月壬午又遷吏部尚書二十年三月乙亥乞休允之均見東華錄吳達禮無傳茲附誌為工部尚書後歷官於此

鑿毀

又按此墓碑在奉天省城東二十里後經太清宮將碑石購去

重修永慶寺碑序

康熙十五年

大清康熙十五年歲次丙辰仲秋立石

嘗聞佛為西域之聖人也竊考其地屬金其性好殺強悍匪彝天實厭之於周昭王三十六季迺篤生一人和惠存心慈悲成性多方誘振化殘忍作良善易暴戾為醇朴強悍之風遂易匪彝之俗遂移於是天下共尊之曰佛而釋教之名自此昭矣然教雖未行於諸夏其好生惡殺以柔制剛之化亦有裨益於中中德者也所以自漢明帝以來國有廢興教愈昌熾至唐貞觀中太宗東征駐蹕於此遼海既定勅鄂國公鳩工營建斯寺名之曰永慶寺將亦欲藉化頑梗之人易悍移暴以得其永慶耳後至勝朝弘治壬戌歲次重修之正德乙亥歲次又重修之亦此意也及於我

皇清肇興兵燹之餘居民離散斯寺之院宇牆垣復頽圯焉迨順治丙申歲奉旨招徠人民復集凡遊覽之人往來斯寺者無不感古興悲適有僧人成 觀其殿宇傾頽佛像暴露隨行持鉢乞化履冰臥雪席不暇煖竭力重修志氣不衰數年來大雄天王山門及後殿五楹次第而理釋迦諸佛逐位裝塑廊廡門堂黝堊丹漆燦然維新而唐明剏修之意遂使不墜可階善繼古人之志事者也工已云竣欲刊石以垂不朽僧人成 請序於予且曰捐資檀越善信人等勞力於斯寺者不有所序何以彰好善之誠以見佛化易之力乎予感其言是以爲序

海城縣儒學庠

蓋平縣儒學庠

登仕郎理金州司

奉天府僧綱司

功德主選

石工人

前衛關帝廟碑記 康熙十六年 綏中縣志

金榜奎撰

帝之生也雖功翊鼎足而實維炎漢家四百年已墜之基緒神之靈也則福佑一統而實凝唐宋後千萬載之人心惟朝廷荷賴其威靈代代加封民人仰瞻而血食處處崇祀凡建一祠卽勒一石所爲表其盛典誌於不朽也古瑞州舊祠建於城之北上玄帝建於城之良方有督師崇煥袁公謂非所宜崇禎三年遷玄帝於城

之北上繼欲將關帝遷建於南上仿摹巍巍有非人力所能移者孰知神之所願人不難爲載輿而登崇墉飄然如行步之速白叟黃童震奇歡拜遷建之後城無祝融之災野無夭札之害倘非神之福庇安能寧靜若是哉後乃經時日久牆垣坍塌廟宇頽圯工巨力綿難於補葺順治六年徐承訓選卜於樓東路北練兵舊署勦修大殿三間馬殿三間倡衆又遷而東焉以妥以祀迄今三十餘年近余與吳公道興來守茲土閱城之南上見碑記因而詢焉謂何以無廟像父老爲余言東街建廟像從此移余則曰有神斯有石宜遷斯石立廟所以爲觀瞻以誌遷移衆唯諾言有風鑑曾云斯石在此大爲不利卽不謂其不利又何憚於一石而不遷歟況不利乎於是諏吉集力遷移而石已損缺不克復用然今之

所欲勒者當不復昔之所爲言也爰求一石以易之余遂與衆相謂曰誠以格神也於斯福以貽民也於斯神之顯赫於天壤間千萬表禩表崇祀於無窮也亦於斯因爲記

康熙十六年歲次丁巳孟冬吉日

清廣寧雙塔崇興寺修造粧塑碑記

康熙十七年

嘗考遼舊志廣寧有大寺二其一爲普慈寺在城東南隅一則在城東北隅卽雙塔崇興寺是也寺勦於唐貞觀十□年太宗征高麗旋師命尉遲敬德監修併建浮圖二座歷元皇慶明宣德嘉靖間屢經修葺其規制宏麗故當時號曰雙塔□□□鍾秀郡八景之一蓋一方形勝地也我大清定鼎燕京以關東爲發祥重地畫郡邑置守令而廣寧稱縣治焉余以康熙乙卯秋來蒞茲土甫

入境流覽山川其氣色鬱鬱葱葱然方振興伊始城以內瓦礫荆榛雖觸目橫塞然諸古蹟之廢墜者其遺址頽基尙可過而問之殘碑斷碣尙得捫而讀之將□時蔚爲物葉□固逆□其次第修舉特人稀力詘未能驟期諸且晚間也居無何偶一遊崇興寺至則見殿舍丘墟壁垣坍塌所僅存者惟兩浮屠屹然未仆耳適有寺僧導行至後陟臺階有新建佛殿櫺扉扃閉及啓視則空其中未貌也僧爲余言寺之廢也久矣先寺僧真空成文發心募緣得銀五百餘金於順治七年四月內庀材起工築臺基廣袤二十丈有奇修建正殿五間禪室三間狹小制度遠不及昔者奚啻什伯然已貲力告竭以故粧塑塗堊諸□德迄今廿餘年未果比來僧等篤懇本城守禦鄭公倡募資財用就厥緒鄭公遂慨許捐金復

引僧等徧丐十方共襄此舉業計有輳積矣言已越歲餘鄭公忽造訪曰雙塔寺粧塑已畢塗堊已竣余不敏董其事盍往觀諸余因偕往但見金碧輝煌丹青絢爛院宇爲之一新中塑佛像三尊阿難迦葉香花菩薩及韋馱天王無不畢具其偉麗雅與殿稱鄭公乃屬余爲文以記之余竊惟 朝廷設官凡以爲地方也廣寧地方經殘毀之餘其尤俟整頓者不一而足官斯土者擇其要者而圖之猶慮力不暇給矧以浮圖之末顧黽勉從事欲以誇示來茲乎而不知天下事有實無益而治之者治之者之過也有似無益而實有益而治之者治之之功也茲寺之由來也遠其關諸形勝也重今日者廣□之亟務固多端而培形勝以爲風氣之所由隆亦非可謂迂緩而不切於時勢者之爲矣不然彼唐之太宗

勗建之歷代之鉅公奉修之紀載之者珉勒俱存豈皆不可為訓也耶吁是可記也夫鄭公諱有時原遼之鐵嶺人現任本城守禦章京募緣僧則崇體□學慧元云

賜進士出身文林郎直隸錦州府廣寧縣知縣介山張文治撰

大清康熙十七年歲次戊午秋八月望後吉日立石

按盛京通志廣寧縣崇興寺在城內東北隅大殿五楹大門一楹相傳唐貞觀時建寺雖燬而雙塔如新全遼志故蹟崇興寺廣寧城東北隅北鎮縣志崇興寺在城內東北隅係唐時古刹太宗東征高麗旋師命尉遲敬德監修元明清各代均重修葺正統十年安置大藏經於寺內有碑碣可徵按奉省古寺志乘多謂尉遲敬德監修盛京通志已辭而闕之此記則言之歷歷

疑本之元皇慶碑

見未

唐於遼東西郡縣極少新書地理志載安

東都護府有巫閭守捉今北鎮縣卽漢無慮縣有醫巫閭山在唐爲北鎮或於此地建寺亦未可知記文爲廣寧縣知縣張文治撰文治山西介休人丁未進士以康熙十四年任廣寧乙卯正康熙十四年與碑合記有本城守禦章京鄭公有時可爲考奉省文獻之助廣寧後置防守尉至光緒元年改城守尉鄭有時蓋卽任廣寧守禦者特在名稱未定以前故云章京

□□資政大夫佟公墓表

康熙二十年

□公諱景祿素以敦厚聞壽終葬遼陽故里後遷居奉天遂改葬

於奉集堡之陽繼家京師貂蟬□立□

斌

□□□□□□□□□□

德以京師距高祖墓千八百餘里歷今共六十餘載懼後世□沒

荒榛莫能識也非表以碣不可來告余曰賦高祖以祖及考系贈資政大夫合葬則夫人高祖母楊氏氏曾祖諱太守震字公又以祖及與賦贈光祿大夫以祖習之公從京遂營兆西玉河鄉之一品夫人王氏奉集堡祖妣李氏丘氏附焉子四卽之公諱學文由佐領從征屢陞至阿達哈哈番隨世祖章皇帝入關加參領擢吏部郎已而以都督僉事總兵官掛鎮朔將軍印守十部郎以病告休享年六十卒祖妣王氏一品夫人合葬玉河鄉又祖妣王氏淑人葬生叔父寧世公先考公彩事同出尹香河晉秩御史巡茶馬政轉分守遷糧儲司右藩左藩陞都察院右副都御史巡撫州寇城

屹若湯祖歿承重歸起復巡撫州湖北川東至則設驛節勞振起人文繼因祖母烏私撫河南提軍務理河道河河無常大役屢興有工柳梢夫役三疏去三大弊及王師出上分聖主之憂下卹閭閻之力積勞疾作卒於公十有六諡勤差禮部侍郎楊公諱正讀祝諭祭先妣君一品夫人蚤逝逮先考沒祖阿達哈哈番娶石氏封一品夫人學生子時傑候補主娶馬氏叔祖諱學道配佟氏合葬西山子彩孫賦元次嫡出長樂縣知縣卒於官葬西山孫賦禕候補知縣賦俊候筆帖式叔祖諱學詩襄垣縣知縣時不屈殉難氏葬西山子彩太府同知孫賦奇叔祖學翰

候□□縣斌叔父則參領兼佐領諱鸞彩寧世公□□因得其□
而□□□□□□□□□□□□□□□□□□□□□□□□□□□□
基始遼陽令聞載陽猗與鎮朔長發其祥偉哉中丞遐邇□德夙
□□□□□□□□□□□□□□□□□□□□□□□□□□□□
特錫昉於□□積慶孔□□□
孫孫摺笏鳴珂聿其休聲逾遠不磨

賜進士第通議大夫經筵講官戶部左侍郎太宗實錄總裁己
未武會試總裁充己未殿試讀卷官壬子順天武會試主考辛
丑□□□□□□□□實錄加食俸一級日講官起居注前內閣學
士兼禮部侍郎詹事府少詹事兼翰林院侍講學士翰林院侍
講學士侍讀侍講國子監司業內□□院檢討翰林院庶
吉士舊治年家眷晚生李天馥頓首拜撰武林關□□

康熙二十年辛酉桂月□□□□□□□□

重修石塔寺碑記 康熙二十年

府尹高爾位撰

康熙壬戌仲春 聖駕東巡告成功於 祖陵差 小臣位 嚮道開

鐵三月十四日自威遠堡旋宿石塔寺僧舍仰觀寶塔沖霄五色
燦爛誠然奇遇見大悲閣年久傾圮金身露處 位 踣跼不安捐俸
銀一季與住持僧樸妙略修整之惟願後世樂善諸公有同志焉
謹勒碑銘用垂不朽云云

按高爾位任奉天府府尹見實錄及盛京通志康熙二十一年
二月東巡見東華錄威遠堡隸開原石塔寺卽今咸平府之崇
壽寺奉省古刹之最著名者見王寂遼東行部志

清重修奉天府文廟兩廡記

康熙二十一年

蓋聞國家以人才爲本而人才以教化爲先自古培植人才靡不以學校爲亟亟況屬 龍興發祥之地將相名臣先後蔚起則宮牆俎豆之規有司又安敢不加之意哉 位自順治丁亥叨列仕途歷躋京尹膺豐沛之重任思廣殖戶口以培養藝之征侵漁之弊以次釐剔夙夜兢兢與諸僚屬飲冰茹檠庶幾杜苞苴而絕耗蠹仰報 皇上加惠元元至意恭惟我 太祖武皇帝以武功肇基遼左逮 太宗文皇帝纘承鴻業建修 文廟 世祖章皇帝撫御區夏以瀋陽爲 盛京設京兆立州縣置師儒於時從龍碩彥彬彬濟濟洎我 皇上臨雍講學尊禮 先師維是奉天 文廟肇造初之初大殿雖告成而兩廡尙未營構規制闕略 位竊疚焉

夫崇祀先哲所以式後進也恢宏廟貌所以肅觀瞻也邇者 皇威赫濯干羽兩階聲教四訖行見比戶歌詠盛於曩時式廓前規尤在今日顧念長吏俸入僅足養廉文武青衿率多貧士難以營度之工重煩我□□是獨捐薄俸飭材庀工補建兩廡各三楹列諸賢之主而祭器亦具焉多士瞻仰之餘庶其景行往哲濯磨砥礪以勸 聖天子昇平之治乎是役也肇於壬戌七月至九月告竣謹勒諸貞石用垂不朽 位非敢言文聊紀事之始末以告後之君子相承勿替云爾

康熙壬戌季秋上浣

誥封中議大夫兩侍 經筵奉天府府尹前都察院左僉都御史加一級通政使司左右通政加一級順天府府丞提督學政加一

級巡按陝西巡按山西巡視兩淮鹽課掌京□□南道監察御史
加三級南和縣知縣高爾位撰

按碑末康熙壬戌季秋上浣誥封中議大夫兩侍經筵奉天府
府尹前都察院左僉都御史通政使司左右通政順天府府丞
提督學政巡按陝西巡按山西巡視兩淮鹽課掌京□□南道
監察御史南和縣知縣高爾位撰云云清國史列傳高爾位傳
漢軍正黃旗人順治四年舉人初任直隸南和縣知縣九年四
月行取授監察御史十月巡按陝西十二年六月巡按山西十
月巡視兩淮鹽政康熙三年三月內遷順天府府丞十九年正
月授左僉都御史十二月遷奉天府府尹二十二年擢刑部右
侍郎爾位所列官皆與傳合康熙二十一年正爾位任奉天時

又清初沿明制設都察院左僉都御史通政司左右通政乾隆
十三年裁左僉都御史改滿漢左通政爲通政司副使見會典
爾位在康熙朝故得官左僉都御史左右通政東華錄高爾位
自奉天府府尹遷刑部右侍郎在康熙二十二年三月庚午國
朝御史題名集順治九年高爾位奉天人由南和縣行取江西
道御史巡按陝西山西掌河南道兩淮巡鹽歷陞工部尙書碑
所闕京下爲畿字南上爲河字會典都察院有京畿道監察御
史河南道監察御史碑言太祖武皇帝以武功肇基按初諡爲
武皇帝見會典蔣氏東華錄諸書碑又言皇威赫濯干羽兩階
按康熙壬戌正平吳世璠之後一年故云

清光祿大夫工部左侍郎加一品祁公墓碑

康熙二十年

奉天通志 卷二百五十九
國家德化翔洽四十餘年中間佐命勳勞以及後先左右之彥風從雲會師師在官自古得人之盛無以過也工部侍郎德甫祁公自少□登朝迄於白首以強幹亮直卓然著稱於朝列康熙二十五年八月□日疾終於家聞者無不嗟悼明年公子防禦君屬余爲碑碣之文以彰公勞績固辭不獲謹按公姓翟爾□氏諱祁通格字德甫祖胡世□父雅魯喝俱以公貴封光祿大夫雅公生四子公其仲也順治初授□弘文院辦事中書尋改撰文九年應進士科登上第館閣中咸以爲榮未幾擢工科都給事中侃侃直言不避權要所條列悉中利弊 世祖章皇帝深嘉納之進內祕書院侍讀學士舟山賊起奉 命隨寧海大將軍伊公爾德率師往討公董造巨艦進逼賊巢一戰而殲之山海餘孽角稽乞降於軍

門者以數千計師旋拜太僕寺卿尋擢內國史院學士康熙三年以才望補 盛京刑部侍郎鉏奸扶良民賴休息久之謝病還京師十三年起補工部侍郎摘發奸欺虛冒之弊歲省數十萬會營 仁孝皇后山陵役勤而費省公之力居多以積勞請急退居私第者六年而卒得年六十有二元配富察氏繼覺羅氏俱封一品夫人再繼覺羅氏子五人長祁臣以督捕員外郎防禦遼陽次翟臣武爾親祁仁百壽皆幼公體貌魁岸性仁厚樂善好施惟恐不及遇大事剖斷如流敷歷中外三十餘年未竟其用也謹據狀排纘行事序而係以銘曰

猗歟祁公邦之蓋臣初直禁祕游歷省垣才地卓犖風節孤鶩留都執法培弱抑暴入佐司空澹泊天操見條釐定奕世斯儆兩朝

宣力 帝鑒乃□生膺顯榮歿永德音彌望高原松柏交映若斧
若堂式瞻式敬

賜進士第通議大夫 經筵講官刑部尙書京口眷 張玉書頓
首拜撰文

賜進士出身翰林院侍講學士奉直大夫吳門眷侍生顧汧頓首
拜篆蓋

賜進士出身翰林院編修文林郎齊郡眷侍生趙執信頓首拜書
丹

按碑題工部左侍郎祁公墓碑以王氏東華錄考之康熙三年
正月甲戌新設盛京刑部侍郎以內國史院學士祁通格爲之
九年閏二月乙卯盛京刑部侍郎祁通額以病乞休許之十三

年七月丁卯以祁通額爲工部右侍郎自原任盛京刑部侍郎
十六年十月辛未轉祁通額爲工部左侍郎二十年十二月辛
卯工部左侍郎祁通額以病乞休從之與碑所言內國史院學
士歷官合碑曰諱祁通格東華錄或作祁通格或作祁通額盛
京通志作齊通額正藍旗人今應以碑爲正又碑言九年應進
士科登上第考題名碑順治九年壬辰科策試滿蒙進士內有
吉通額正白旗人

碑末題賜進士第通議大夫經筵講官刑部尙書京口眷 張
玉書撰文賜進士出身翰林院侍講學士奉直大夫吳門眷侍
生顧汧篆蓋賜進士出身翰林院編修文林郎齊郡眷侍生趙
執信書丹又按東華錄康熙二十六年二月丁卯張玉書爲刑

部尚書二十七年二月壬戌張玉書兵部尚書碑言公退居私第者六年而卒祁通格以康熙二十年乞休退居六年爲康熙二十六年正玉書任刑部尚書時顧沂見館選錄順天府大興人康熙癸丑傳臚原籍江南長洲故稱吳門

耆獻類徵詞臣類趙執信傳執信山東益都人少穎慧工吟詠康熙十八年成進士改庶吉士時年十九三十一年授編修爲朱彝尊陳維崧毛奇齡所引重訂忘年交二十三年充山西鄉試正考官擢右春坊右贊善二十八年以國恤中譙飲觀劇爲給事中黃六鴻所劾遂削籍云按此碑題銜爲編修尙在未擢贊善前

清加贈太子少保兵部尚書諡文毅坦公馬公暨配特贈一品夫

人李氏合葬墓誌銘

康熙二十二年

賜進士出身禮部尚書武英殿大學士總裁實錄聖訓方略漢

陽眷弟吳正治拜撰

賜進士出身經筵講官內閣學士京口眷侍生張玉書篆額

賜進士及第翰林院侍讀學士華亭眷侍生沈荃頓首書丹

聖天子用神武鋤反側戡定遐荒旣已爵賞諸有功猶惻然南顧曰嗟我舊臣有抗節封疆九死不渝者朕甚傷之於是有殉難各官應加褒卹之諭而巡撫廣西右副都御史襄平馬公闔門死事爲最烈先是將軍傅公具以事聞吏禮兵三部僉議優卹如典禮上特命加太子少保兵部尚書諡文毅輿櫬旣還賜給全祭葬地贈溢於家門爵賚延於後嗣又親題御筆俾揭石於隧道之阡爲

諸臣所未有下及一時仗劍相依患難者九人出死入生並得被恩敘錄以爲天下勸天下聞公義烈泣鬼神動天地莫不慷慨歎慕至悽然流涕嗚呼盛哉自古國家多難之秋人臣之致身非一其生者僇力疆場收戡亂之功其歿者亦以一死激忠義之心而寒亂賊之膽用是國勢張而兵氣日振所以睢陽嚼齒祿山不旋踵就戮司農奮笏朱泚不逾時授首也始公仗鉞粵西寇方充斥左江右江皆岌岌煽動而平梧土寇與猺獍諸蠻出沒無常公勦撫兼行折其渠魁餘全活以萬計又爲民請命省腳費平鹽價寬木禁停採買復有司邊俸建郡國學宮善政班班具舉及吳逆反孫延齡叛以公繫人望首欲脅之同亂公不可遂被重圍卽署中投環幾絕賊排闥入救引刀自剄又不得殊死乃盡室羈係者四

年公亦謂逆燄雖張人心尙固倘未死而義旅一集中外相應立可瓦解故潛遣二子一孫間行赴闕事機不偶滇逆踵至公被執賊營豎髮裂眦罵賊不屈甘死如飴二子九僕一時遇害妻妾婦女次第自經死者三十餘人嗚呼死生之際大矣重以四載之幽囚一念少移沒身莫贖非公識定於平時行孚於同室不及此而粵人亦因痛公之死憤賊益甚王師一至掃蕩曾不反掌是公身死而全粵之恢復實賴之未幾戎首孫逆先公被誅而滇中羣逆未死者寸磔梟街已死者揚灰都市公殺賊之志已釋然無遺憾且聖恩崇重褒卹寵蔭有加長公早登副憲次子及孫方先後擢用益大其家聲公雖旣死垂光史冊豈不千載奕奕有生氣哉公諱雄鎮字錫蕃號坦公始祖副尉公仕遼因居遼陽左衛至宣議

奉天通志 卷一百五十九 五十六
公族始大曾祖別駕公通判太平府司權蕪關清德著聞祀名宦
祠祖司訓公諱與進以學行名家並以總督公貴贈資政大夫曾
祖妣楊氏祖妣趙氏俱贈夫人公父總督公諱鳴佩從龍入都爲
昭代名臣少時讀書采經史格言輯忠孝事爲論註傳於家公始
以任子入仕起家工部司寶源局督琉璃廠營造孝陵夙夜恪恭
各底其績既而入爲僉都御史尋遷學士顧問稱旨由是有巡撫
之命自山右改任粵西賜宴內殿又賜御衣名馬眷注加隆宜公
之感激而捐糜以報也公生於天聰甲戌年正月二十八日被難
於康熙丁巳年十月十二日享年四十有四元配張氏繼配李氏
同日殉難長子世濟次世永卽從撫署重圍中先後穴垣夜逸奔
奏闕廷者也世濟奉旨優敘候補大四品京堂見任左副都御史

世永蔭監生候選知州女四俱李夫人出孫國楨世濟出公遇難
時李夫人及家屬尙在幽繫初聞難冢子婦董夫人卽拜姑請死
次二女暨公妾顧氏劉氏長公妾苗氏皆相攜就縊李夫人一一
爲含殮畢乃自繫帛絕吭慷慨從容蓋古今罕儷者康熙二十二
年三月十九日世濟等奉公柩卜葬於玉泉山黑塔村之原李夫
人耐焉因具狀請銘於余竊念公歷宦宦績多卓卓可紀不具論
論其大節光昭天壤者如此系之以銘文中刪處銘曰

泰山峩峩石嶄嶄嶽降巨人挺貞直間氣遙分遼海側經文緯武
千夫特清門奕奕稱通德臣忠子孝垂懿則開府蒼梧炎瘴息兩
江五嶺無叢棘一朝豺虎肆侵逼望闕馳書汨霑臆四年幽繫情
悽惻恨不雙飛生羽翼髮指衝冠罵狂賊七星巖畔妖氛黑闔門

九死惜不得桂林白日青燐色吞聲野哭人千億伏波膏澤留蠻
域公叩天閭陳悃幅封豕長蛇請誅殛蕩平王路無傾仄生榮死
哀耀南北君恩不貲臣死職天地綱維自此植公乘白雲歸故國
霓旌桂旗儼可卽

按前誌載與遴生潤甫此誌載與進爲坦公之祖未知孰是姑
照錄之

按文毅馬公爲馬雄鎮雄鎮撫廣西死事頗烈清史稿諸書皆
有傳康熙八年十月乙丑雄鎮自內國史院學士爲山西巡撫
九年二月癸酉爲廣西巡撫十三年二月辛酉廣東廣西總督
金光祖奏廣西將軍孫延齡反殺都統王永年等廣西巡撫馬
雄鎮被執十七年四月辛卯撫蠻滅寇將軍傅宏烈奏故撫臣

馬雄鎮當康熙十三年春逆賊孫延齡反叛時誓死抗賊又密
遣其子馬世濟從間道赴京師請兵孫逆覺之囚雄鎮於別室
及康熙十六年十月吳逆僞將軍吳世琮破桂林殺孫延齡令
兵士擁雄鎮至營逼降雄鎮大罵遂爲吳世琮所害並殺其幼
子三郎四郎及家人等其妻妾女媳皆投繯自盡闔門殉節世
所罕有而馬雄鎮幕友舉人孫成儒士陳文煥等周旋患難冒
險來歸忠君信友兩全其美伏乞敕部優卹馬雄鎮一門忠義
以勵臣節敘錄孫成陳文煥等以鼓忠義之氣得旨原任廣西
巡撫馬雄鎮抗詞罵賊精忠報國並家口殉難忠貞慘烈深可
憫惻作何恩卹議政王大臣議奏陳文煥等冒險來歸可嘉一
併議奏尋議原任廣西巡撫侯廣西平定後查明殉難人員一

併議敘其子馬世濟從間道赴京請兵可嘉應從優議敘加恩以通政使司左右通政大理寺少卿先用其幕友舉人孫成以同知用儒士陳文煥以知縣用從之

按盛京通志孫成順天大興人康熙十九年任錦州

府知十九年七月戊申贈廣西殉難巡撫馬雄鎮太子少保兵部

尚書並妻李氏予祭葬加祭一次諡文毅廕一子入監讀書按東華錄據實錄述雄鎮殉贈頗詳又載二十一年正月壬戌上元節大學士部院卿寺翰詹科道諸臣特於乾清宮賜宴命光祿寺卿馬世濟右通政陳汝器至御坐前親賜飲以馬世濟爲殉難巡撫馬雄鎮之子陳汝器爲殉難副使陳啓泰之子誌言長子世濟現任左副都御史世濟以是年正月丙子自光祿寺卿遷左副都御史亦見東華錄及清國史忠義傳潤甫馬公墓誌載與遴生潤甫此誌載與進爲坦公之祖王士禎蔣士銓馬文欽公傳張宸扶風忠節錄書後皆作雄鎮祖與進或潤甫誌有誤誌首題賜進士出身禮部尚書武英殿大學士總裁實錄聖訓方略漢陽眷弟吳正治拜撰賜進士出身經筵講官內閣學士京口眷侍生張玉書篆額賜進士及第翰林院侍讀學士華亭眷侍生沈荃頓首書丹吳正治康熙二十一年十月己丑自禮部尚書遷武英殿大學士康熙二十年三月庚午張玉書自翰林院侍講學士遷內閣學士二十二年十二月壬寅遷禮部右侍郎皆見東華錄詞林典故沈荃字貞黉江蘇青浦籍華亭人順治壬辰進士授編修官至詹事加禮部侍郎銜諡文恪碑題翰林侍讀學士則在未擢詹事前也

誥贈淑人馬夫人董氏墓誌

康熙二十二年遼陽縣志拓本

賜進士出身保和殿大學士兼禮部尚書前兵工禮三部尚書

宛平眷弟王熙拜撰

賜進士第翰林院學士禮部侍郎潞河眷弟張士甄篆

賜進士及第經筵講官翰林院侍讀學士華亭眷侍生沈荃拜

書丹

康熙甲寅粵西之變巡撫馬文毅公以身殉王事闔門從死者十九人而董淑人稱最烈淑人爲今中丞君世濟之正配文毅公冢婦也生長閩閩又當文毅公開府建牙習見華膺享逸樂而淑人克盡婦職平時上奉舅姑下御僕隸敬謹靡懈寬嚴得中凡織紉饋澹之儀罔不嫻整斯已難矣況當顛險之際而能倡率闔門從

容就義之死而不之悔其節烈之概真可與日月爭光寧止爲聖朝揚徽彤管已哉余故取其殉難一事詳誌之按狀淑人爲山東陵縣令董君子華長女年十五歸中丞君越五年隨侍文毅公官廣西又二年值孫延齡叛拘囚三載至文毅公被害遂偕妾苗氏俱自縊於梁間是爲康熙丁巳十月十二日也方延齡之遙應吳逆而叛也倉卒禍起時巡撫久不督軍務無標兵衛禦府第被圍文毅公計賊黨雖衆皆烏合易破乃命中丞君詣闕言狀請援兵臨行淑人泣曰君行矣若王師至破賊與君相見甚幸脫事不濟惟一死以報耳因遣長子隨中丞弟潛走京師時內外相持久賊黨百計誘脅文毅公終不屈而二子一孫北來乞師者相繼賊偵知之且憤且懼籍公家盡收其家人繫之囚室嚴邏防守淑人當

奉天通志 卷一百五十九
流離困阨時事尊嫜倍謹諸子女接踵餒死無怨言迨逆孽吳世
琮誘殺延齡文毅公罵賊抗節淑人奉姑李夫人尙繫禁所守卒
有房李二千總者登梯以凶問告淑人向姑哭拜曰氏所以隱忍
不死者尙有所待也今事已至此願相從侍奉地下遂自縊縋斷
仆地者再額足皆毀卒不撓妾苗氏亦從死嗚呼死生亦大矣士
君子讀書明道義者居恆非不侃侃自命至臨危輒依回澗忍不
能自裁一旦喪其生平者比比然矣況在閨閣豈不難哉事聞奉
特旨追贈淑人給應得誥命淑人雖死亦可慰貞魂於九泉矣淑
人生於順治辛卯年僅二十有七男女共六人長國楨卽先赴京
者其次子女並以飢寒死於囚室先是淑人旣死守者哀其節烈
收遺骨葬於桂林北關外廣福寺後及中丞君迎文毅公李夫人

櫬並攜以歸康熙二十二年三月十九日葬於玉泉山黑塔村之
原銘曰

生鸞族隕鯨穴罹百憂堅一節妾同歸成雙烈事徵信非空設谷
爲陵銘不滅

夏成德父母墓

康熙二十六年
錦州東黎兒峪

皇清誥封光祿大夫夏成德先考慧庵公一品夫人□氏先妣太
夫人之墓 子男□□率孫贊元叩頭敬立

康熙二十六年十月□□吉日

按夏成德爲明末遼東總兵松山一役降清家於錦州故其父
墓在是此碑題署頗不中程

大清福陵神功聖德碑

康熙二十七年

惟

天眷佑下民綏靖方域篤生我

皇曾祖太祖高皇帝肇興東

土奮師一旅式闢皇圖大武布昭深仁洋溢用造我國家萬億年

不不基駿德鴻功於鑠顯懿駕軼亙古予小子纂承洪緒既奉册

寶崇上

尊諡載緝徽猷炳垂方策惟

陵寢宜有功德之

碑敬述大略永勒貞珉敘曰

太祖承天廣運聖德神功肇紀

立極仁孝睿武弘文定業高皇帝姓愛新覺羅氏諱弩爾哈齊先

世發祥長白山之陽禎符神貺歷著休徵至

皇始祖肇祖原

皇帝式廓舊業寢熾寢昌又五傳至

顯祖宣皇帝世濟其勤

流長積厚景運懋集神器攸歸誕啓我

太祖高皇帝

顯

祖之長子也

宣皇后娠十有三月乃生龍顏鳳目豐頤大耳

天表玉立舉止非常少不飲酒嬉戲稱爲聰睿貝勒及長騎射絕
倫雄略蓋世用兵無敵而又至誠御物大度容人先是有望氣者
言滿洲將生聖人統一諸國至是滿洲長白山及東海扈倫諸部
落爭相雄長癸未春蘇克蘇濟河部圖倫城有尼堪外蘭者陰搆
明軍首逞大難於我時 太祖皇帝年二十有五泣血誓師枕
干問罪以遺甲十三副攻尼堪外蘭克圖倫城復攻之於甲板誅
諾米納奈哈達取撒爾湖城時異己猜忌包藏禍心伺間竊發天
威所懾罔弗獸驚鳥散遂俘兆佳城長李岱取馬兒墩平定董鄂
哲陳渾河等部丙戌秋禽斬尼堪外蘭於鵝爾渾城戎首服辜先
聲震疊環境諸國相繼削平旣而葉赫哈達吳喇輝發科爾沁國
席北卦爾察朱舍里納殷路九姓之國合兵三萬人分道來侵偵

者夜告 太祖皇帝安寢達旦蓐食濟師殲其渠首餘部皆潰
斬首四千獲馬三千匹鎧冑千副羣方讐服乃增築城墉修飭法
制創製國書開金銀礦鐵冶所產蠙珠織皮通厥貿易財用殷阜
肇立軍制師律精嚴國勢日盛丙午冬蒙古五部落尊 太祖
爲神武皇帝歲時朝貢絡繹相望而哈達輝發吳喇數渝盟先後
征討悉定其地每當軍行輒見五色雲瓦天祥光四塞立奏鉅功
遠邇翕服益四旗爲八設固山梅勒甲喇牛录額眞遞相統轄命
佐領下各出牛種屯田積穀貯倉置理政聽訟大臣緩刑慎獄野
無剽竊路鮮拾遺國中大治帝業已成貝勒大臣集議勸進丙辰
春正月恭上 尊號曰覆育列國英明皇帝建元天命時年五
十有八越二年定策征明明政久弛棄絕和好援我仇讐蕩搖我

邊陲於是誓告有衆類

帝禡旗而行遂拔撫順降臺堡五十

所繼下清河明大舉稱兵會於瀋陽號四十七萬張左右翼左翼
以杜松王宣趙夢麟張銓由渾河出撫順關馬林麻巖潘宗顏由
開原合葉赫兵出三岔口右翼以李如柏賀世賢閻鳴泰由清河
出鴉鶻關劉綖康應乾合朝鮮兵出寬奠口向董鄂四路來侵

太祖皇帝分精騎奮擊大破其衆五日而悉殲之城界凡取開
原破鐵嶺滅葉赫五年克遼陽瀋陽定議建都始築東京尋取廣
寧拔撫順十年遷都瀋陽由是東漸海西訖遼南及朝鮮北暨嫩
江烏龍江以至使犬諾落諸路罔不臣服 太祖皇帝神武天
錫決幾制勝變化若神每戰輒單騎深入裹創斬馘色神不動善
駕馭材雄推心置腹撫納降附棄捐忿隙恆予擢用法所當坐雖

親昵罔所私攻拔城邑嚴禁軍士安輯居民是以羣策競奮率土
思歸御極以後拓地開疆日不暇給而躬勤於聽覽留神於載籍
修德納諫親賢遠奸建二木於門俾下情欲達者書之以進尙寬
大崇節儉睦宗親厚風俗重農桑賑窮乏垂示典訓蕩平正直允
爲萬世法程猗歟盛哉天命十一年八月庚戌崩 聖壽六十
有八在位十有一年天聰三年二月己亥葬 福陵天柱山崇
德元年四月上 尊諡承天廣運聖德神功肇紀立極仁孝武
皇帝廟號 太祖康熙元年四月加上 今諡嗚呼有明德
衰海宇板蕩之時生民顛隕之會我 太祖皇帝應運蹶生手
提天戈披榛辟萊櫛風沐雨掃邊陲如破竹定遼左若建瓴戡亂
求寧非富天下功極於配 天道隆於昌後歷稽曩代創業垂

統之君未有邁此締造憂勤經綸宏遠者也瞻赫濯之如新撫承
平之永賴歌思光烈曷罄名言謹拜手稽首而作頌曰

天造大邦勃興東極長白山高苞符開闢鳥生商履武誕稷奕
葉炳靈肇基王迹 太祖龍飛旋乾轉坤齊徽炎昊比烈義軒

時惟草昧陟巘降原一成奮起雷動雲屯蠢爾仇方敢作牙孽赫
斯一怒恭行天伐寢甲枕鞍神勇迅發巨憝授首戎心式遏奇謀
倜儻遠略深沈內構者挫外訁者禽單師十百摧彼強隣九邦潰
糜四路掃塵攜貳則誅歸誠則撫義問宣昭仁恩施普大畏小懷
實揚我武來庭來王日闢疆土疆土旣闢曆數在躬膺圖受籙響
應景從三才協軌百靈潛通指麾盪滌振落發蒙覘敵烏集濟師
冰泮夾日貫月卿雲糾縵不義是征功成惟斷秉鉞稱干 帝

奉天通志 卷一百五十九
心厭亂環山負海風靡雲披朱旗急捲汗馬爭馳後我斯恫歌舞
迎師紀元頒朔建策開基爰定軍營森羅鵝鶴步伐止齊井牧相
扞爰建國都屹峙屏翰扼吭拊背皇居攸煥爰命分職勸哉臣鄰
爰慎折獄恤哉祥刑爰達民隱鞅鐸重臣爰製國書蝌斗更新訂
謨孔彰風規渾噩禹誓湯征千秋繼作聲靈覃敷東西南朔大統
迺膺新命迺廓既詒既翼如鎬如豐九圍是式萬國來同卜年卜
世惟 太祖功巍巍蕩蕩昭格 蒼穹右享郊壇敷時思繹
炳耀圖書輝煌球璧景瞻 福陵神丘是宅百川縈朝羣山拱
掖葱蘢王氣松楸鬱蒼玉衣永鎮弓劍長藏億載顧慕春露秋霜
樹茲穹碑錫嘏無疆

康熙二十七年十二月初五日孝曾孫嗣皇帝玄燁謹述

按清自福陵以次皆有聖德神功碑至道光始停諭旨見王氏
東華錄

大清昭陵神功聖德碑

康熙二十七年

天以神器畀我國家洪惟

皇祖太宗文皇帝智勇神聖光昭

太祖高皇帝丕緒帝紘皇剛是廓是恢榦不庭方構造鴻業

垂裕

皇考世祖章皇帝大一統之基貽億萬禩無疆之休維

予小子纘承

聖緒念

陵寢宜有功德之碑敬勒貞珉昭

示無極敘曰

太宗應天興國弘德彰武寬溫仁聖睿孝隆道

顯功文皇帝諱皇太極

太祖承天廣運聖德神功肇紀立極

仁孝睿武弘文定業高皇帝第四子也

母孝慈昭憲敬順慶

顯承天輔聖高皇后生而神靈徇齊明敏龍行虎步顏如渥丹嚴

寒不栗舉止非常 太祖皇帝特鍾愛焉既長英武豁達孝弟
恭敬慈愛和順秉心寬弘好觀書史一有聞見終身不忘沈機果
斷羣望攸屬天命十一年八月 太祖皇帝升遐諸貝勒大臣
咸推我 皇祖才德冠世宜繼承帝業以九月朔嗣登大位建
元天聰時年三十五踐阼之後愛養人民撫綏中外崇儉務本修
政任賢仁聲義問無遠弗届除慝討貳用整六師迺擊蒙古執一
十四貝勒奏凱八纛下迺征朝鮮克義州進拔漢山城入安州抵
平壤朝鮮王李倬遁江華島遣其弟覺來行成遂盡反所收地與
盟而還迺征察哈爾翦多羅特部落編俘獲爲氓迺伐明白遵化
臨北京略良鄉斬其將滿桂孫祖壽擒其將黑雲龍麻登雲還拔
永平迺拔大凌河降其將士於是孔有德耿仲明等航海來歸迺

征黑龍江瓦爾喀下之察哈爾舉國來附獲歷代帝王傳國之寶
天聰九年冬羣臣勸進尊號 皇祖辭讓再三明年夏四月表
上 尊號曰寬溫仁聖皇帝建國號大清改元崇德告於

皇天后土追王 列祖上 太祖高皇帝 高皇后尊諡

羣臣咸上表賀乃錫宴肆赦是年朝鮮毀盟討之拔其都載飛舸
於車凌江華島李倬自縛請爲臣釋之還并歸其俘獲朝鮮感服
勒石南漢以銘勳德遂率水師渡海克皮島既而大出師遣將毀
關入分左右翼由涿州略地至山西界復自臨清渡河破濟南克
城四十有九降者八與明兵五十七戰皆捷六年圍錦州入其郭
洪承疇以兵來援 皇祖陳師於松山杏山之間明兵號十三
萬望見 皇祖張黃蓋往來指揮皆懼謀夜遁我師分道急擊

連大破之擒承疇降祖大壽錦州松山杏山塔山悉下又命將入關破兗州東抵寧海克城八十有八降者六陣敗明兵者三十九於是天戈所指罔不率俾黃河之源青海之濱使犬役鹿之國來賓恐後野駝奇獸黑狐紫貂重譯來獻聲教之遠功烈之盛古未有也嗚呼維我皇祖克配天心誕膺景命聰明睿智神武不殺懷柔以德變伐以威大勳用集大猷是程無有內外乃罔不卽敘親九族正百官修明典章誕敷政教隆郊丘廟祀之儀定頒曆朝會之禮辨鹵簿旗章服御之制聲名文物煥然弘備釋奠孔子以四子配立文館譯書史於翔鳳閣俾儒臣記注得失開科目取士諭臣下盡言無隱論功封兄弟子姪爲諸王貝勒外藩蒙古亦論功封爵有差優禮降臣寄以心膂賞罰詳明斷獄平允綱

舉曰張仁至義盡至於審制度定律令斥邪術禁喪祭踰禮者務農桑廣漁獵以豐民食皆可爲萬世法凡勤勞國事者賜與必優渥召近臣入宮日至再三講論政事以賓禮遇之諸國新附之人入見必詢其姓名世系慰勞如舊識天語藹然以故雖至難馴者無不悅服如薩哈爾察卦勒察瓦爾喀虎爾哈諸國素不習禮法亦貢獻稱臣其貝勒大臣至俱恩遇之如子弟故其部落降者相繼常念中原生民塗炭欲與明和好惟務修德不樂觀兵屢貽書明邊帥曰朕意在講和不忍無辜赤子慘罹鋒鏑明之君臣置若罔聞致煩天討然每出師必諭諸將授以兵律嘗曰明之土地人民天以與我是民卽我民也故師行雖嚴寒不入屯堡士卒死傷弔問不遺每戰勝攻取符瑞駢集必曰

上天眷佑惕然祇懼克敵必祇告於

廟蓋敬

天尊

祖勤民若是至其

豐功厚澤與天地同久大有國史所不能

盡書者矣崇德八年八月庚午崩

聖壽五十有二在位十有

七年九月壬子葬

昭陵隆業山嗚呼八音遏密萬國感痛實

惟

至德深仁爲生民主以弘我國家之大寶命愾僣見聞陟

降庭止謹述盛概拜手稽首而系之以頌曰

於赫

皇祖纘

太祖之緒誕敷乃文孔奮厥武整我師干

拓我疆土東奠朝鮮西讐蒙古貳則獲之服則釋之降則憐之賢
則臣之有言遜志則必遏之有言逆耳則必納之治分六曹職統
三院筆簪史臣書譯文館與神爲謀以古爲鑑制禮明刑儀章是
憲一人有慶肇域四方四方來王自天降祥和鸞鏘鏘旂旒央央

聿昭茂祉焯燿章光乾符效珍坤儀開奧旣協靈圖誕升顯號濟
濟師師羣工舞蹈曆數攸歸謳歌前導乃禋乃祀於 廟於

郊乃燕乃射於野於朝乃赦乃宥於犴於牢乃漁乃獵於狩於

苗乃命紫宮清寧正中麟趾在右關雎在東崇政篤恭翔鳳飛龍
文德武功以綏萬邦松山之陰杏山之下戰士連營崇墉百堵取
彼元戎繫之以組肅將 天威救民水火屹屹榆關王旅所經

而幽而并而冀而青而亮而徐克其百城涉河踰濟及於東溟時
乘以乾帝出乎震罔有遐邇民莫不信或獻其琛或輸其賚河源
海壖協靈效順有典有則貽萬子孫言爲丘墳績媿農軒佑我

皇考大啓幅員允

皇祖之德

皇祖之勳瞻仰

昭

陵在盛京之北雲霞所棲松柏斯植有穹者碑昭宣世德弗祿來

崇時萬時億

康熙二十七年十二月初五日孝孫嗣皇帝玄燁謹述

按此碑爲康熙時工部左侍郎顧觀廬漢所書朱竹垞曝書亭

集長洲顧公神道碑銘云公諱藻字懿樸號觀廬官工部左侍

郎公書法尤精在米芾趙孟頫間嘗奉命書御屏又書泉林碑

福陵昭陵神功聖德碑上覽公書輒稱善近人唐晏輯國朝書

人輯略不收顧公蓋失檢也

清新建北鎮醫巫閭山尊神板閣序

康熙二十九年

昔虞舜所封十有二山醫巫閭其一也周禮職方氏以醫巫閭山爲東北幽州之鎮此見於經史可考而知者歷覽碑碣所載唐以上爲北鎮神皆進公宋元進封王明代屢修禮祀有加無已迨

本朝尤爲發祥名勝豐鎬鍾靈每遇大典卽遣官祭告可不謂隆焉邇年來頻憂亢陽因虔禱於神甘霖立沛自今以始歲其有年孰非尊神之隆康哉乃山靈有赫而廟貌已湮其前後左右一片荒基俱鞠爲茂草矣僅存正殿與饗殿二層亦傾圮難支風雨不蔽如瑾常仰屋咨嗟無可如何幸有少司寇高公先爲大京兆時曾登山謁廟早知神像之將露處也茲特捐俸貳拾兩令備蓆棚如瑾以用蓆不如用板之可久遂與住持僧衆亟商所以護持神像者爰鳩工庀材構板閣三座正中一東西兩旁各一其制如屋然有脊有簷有楹柱覆以厚板塗以丹雘俾北鎮尊神暨諸位從神丈六金身咸有所憑依而妥侑焉然此第一時權宜之計耳若夫稽祀典答神休題請修建輪奐番皇將與閭峰並

時則重有藉於大仁人君子之留意矣

大清康熙二十九年歲次庚午仲秋月

吉日

廣寧縣知縣黃如瑾恭記

按盛京通志職官黃如瑾江蘇溧陽進士

順治戊戌

以康熙二十七

年任廣寧縣知縣記所言少司寇高公先為大京兆即高爾位

自奉天府府尹歷刑部左右侍郎以康熙二十五年六月憂免

見清史稿部院大臣年表又代黃如瑾者為王國柱以康熙三

十七年任廣寧則如瑾在任頗久碑題二十九年仲秋正如瑾

在任時

鐵嶺縣學記

康熙三十八年

提督學政屠粹忠撰

今天子膺曆御宇三十餘年聲教遐迄武功共濯海隅絕漠之城
人齒受生淪浴膏澤罔弗尊親乃益偃武修文崇尚儒術日與在
庭名彥講求政體命禮部廣取士選拔其尤引見郡邑親民之吏
品其賢否用昭激勸慎選大僚以端其表率所以長育人倫而興
起德化者意良厚也戊寅冬十月車駕巡幸奉天念留都首善之
地吏課宜擇京兆尹而教士之責專在學臣乃以蓋牟王公為大
京兆而提督學政則以命余余既視事垂一年奉天之屬邑曰鐵
嶺人文稱最其邑令則淮陽許君念中也許君起家進士政治卓
有能聲余每褒而異之一日以親建儒學碑記請問其地則城東
南隅購若干畝其形則龍山聳秀麟瀆環流其規制則殿宇宏敞
門垣備具其經費則許君所捐俸倡始紳士協力勸事其時日則

始乙卯夏迄秋而成君信勤於其職哉夫吏道之敝如黠賈居奇
贏焉方其一官入手其心思計畫汲汲身家利祿之是圖舍此而
外不暇及也卽有廟貌峩峩宮牆業業春秋釋奠不鞠茂草足矣
而許君所樹若此其度越詎不相遠耶昔余爲封邱令時河決未
復城沒於水久矣余度地形繕陶甃不踰年而城成百方招徠飛
鴻爰集當事者以爲能由是上名大府備位諫垣今許君宰彈丸
之邑撫鳩鳥之民養育訓誨近成樂國凡其設義塾置倉廩興廢
振絕民不勞而事舉大京兆尹嘉之上其名吏部行且當膺內擢
其所獲不亦豐歟君又工詩賦嫻文章天子巡狩之日仿班馬賦
體作盛京賦數千言率諸生爲東巡詩歌頌德功優詔嘉獎用錫
宴賄其所以鼓吹風雅黼黻太平者將來更何如也顧余謂學校

之興行不惟其近惟其久許君之所爲有足多矣使鐵邑人士果
皆束修砥行以無負譽髦之選鐵邑之令果皆修明政教以仰副
作人之意余於斯能無厚望哉奉宣朝廷之德意以率先長吏錄
長吏之勤以訓飭多士風示來者余之職也於其請也書以應之
按東華錄康熙三十七年十月丁巳車駕至盛京卽記所言東

巡王國安以是年再任奉天府府尹

漢軍正旗人

屠粹忠

浙江鄞縣人

戊進士

三十八年任奉天府府丞均見盛京通志許志進以淮安

進士

康熙辛未

任鐵嶺縣知縣

康熙三十九年彭其儁代

復州出水祭姪文石刻

拓本

瀋故顏魯公祭姪稿石刻此帖後有陳深陳繹曾文徵明三跋
據書畫舫所記殆卽停雲館本也唯帖後多嘉靖庚戌羅洪先

一跋國朝鄧秉恆一跋又均稱聶雙江家所藏墨蹟則不但非停雲亦非餘清戲鴻也帖尾有翁覃谿先生附刻一行此所謂聶雙江本也念庵跋則後於停雲之刻九年矣亦足備考云云而亦未詳此本所刻源流似爲覃翁刻矣道光間復州漁人於海濱網得此石以塞豚柵士人某見有字跡移置於家遂漸摹揚尙不知其可寶也嗣士人家中落稱貸於州少牧趙君石乃歸趙夫以希世之珍旣落遼海土人不能守而遊宦得之甚可惜也

劉星黎祭姪稿石刻出海記

復縣志

顏太師祭姪稿其書法之佳

古人言之已詳且盡固與爭坐位同爲希世寶也向祇傳諸海內遼東人未得親見此石道光十三年復州西海長生島鶯窩

風折商船貨盡飄沒舡主撫楫大呼曰諸物不足惜麻袋中兩寶石摸得者當以五十金贈衆莫之應次年春業漁某網諸海濱置豚柵側用以作礪具所謂美玉而砥砭者也六月間富人趙公西林避暑海上囑工覓搗衣石工曰某石本天成不琢可用且無須多金引視之則祭姪文刻也字雖模糊諦視方隅未稍殘缺遂以制錢二千文購獲之初猶疑爲贗本未甚寶重是秋進士強公杏齋來牧是邑訪知之詣石詳核大驚喜曰此確實章錄所載顏魯公祭兄子季明文稿也公無疑須珍皮之遂揚印若干篇走送京師京師亦寶貴焉自是此石乃著名丐搨者踵接無虛日未幾趙蕭索兄弟舉石分之如潘氏子之於絳州帖久之飢驅食迫欲留此石不得適任復州吏目趙公法之

以五十金得其兄之文稿原刻一石以東錢百二緡得其弟之諸名人跋語一石由是藏諸官府貧士之欲搦者維艱同治十三年趙解篆橫山書院山長徐韻初先輩集諸生欲爲留石舉未果而此石遂作趙歸裝矣

張時宗祭姪稿跋上同唐顏魯公祭姪季明文稿越今千餘年中經宋陳子微元陳伯敷明羅念庵文徵明清鄧元固翁覃谿諸先生題跋或攷據其事實或稱述其書法精審詳明後人莫贊一辭自元固後不知何時上石流傳誰氏相傳有南船遇險於復邑之西海船主謂土人曰他不足惜有二寶石沈海得者當酬以巨金人爭泅之竟不可得道光間漁人於邑西南紫駝峰下之老古島網得二石一長四尺餘卽祭姪稿也一長六尺餘

則跋文也高均尺餘漁人不識重寶用砌猪溷故字跡頗多磨滅時有邑商趙明道者愛其光澤購以爲砧詳加辨識乃知爲魯公書州少尹趙公良楷字灑之工書法聞其事以東錢百五十緡購置於邑南關之永豐寺督工拓印士紳與事者亦均得分潤趙公去任日邑中翰徐韻初時主講橫山書院倡議留石未果後歸復州知州王公廷楨以石獻於奉天廷紹民府尹雍自此遂輾轉入於內府不可復見矣

按遼陽袁金鎧氏往在北平購得祭姪稿石刻二方一爲正文一爲題跋蓋爲摹刻本非復州出水之原石也

